


SAMOSTALNI SINDIKAT OSNOVNOG OBRAZOVANJA I ODGOJA
FEDERACIJE BOSNE I HERCEGOVINE – KANTONALNI ODBOR USK-a

Bihać, Ul. Krupska 26

Tel/fax: ++387 37 223-661
e-mail: ssooio.kousk@yahoo.com



Sindikatsrednjeg i visokog obrazovanja, odgoja, nauke i kulture
Bosne i Hercegovine
SSVOONK BiH
KANTONALNI ODBOR USK-a BIHAĆ

Bihać, Krupska 26

Tel/fax: ++387 37 223-661
e-mail: predsjednik ssvonk usk@hotmail.comBih

Broj: 01-HZ-FS-89-81/16.
Bihać, 01.10. 2016. godine

ČESTITKA POVODOM 5. OKTOBRA - DANA UČITELJA

Poštovane kolegice i kolege,

Učitelji, nastavnici, profesori, odgojitelji, pedagozi i svi ostali zaposleni u odgoju i obrazovanju, vi koji obavljate najplemenitiji posao, a istovremeno i najodgovorniji za budućnost cijelog čovječanstva, želimo vam uputiti iskrene čestitke povodom 5. oktobra -- Svjetskog dana učitelja.

Od pamtivjeka pa do danas, od nas učitelja se zahtijeva da svoje učenike podučimo strpljivosti, odvažnosti, upornosti, marljivosti, hrabrosti, iskrenosti, da im ulijemo znanje, pripremimo za život i sve izazove koji ih očekuju. Sve ovo moramo uraditi na nježan i obazriv način, a istovremeno dovoljno motivirajući da u njima samima potaknemo interes za istraživanjem novog i neistraženog. Svakodnevno smo izloženi novim izazovima, koji od nas traže nova znanja, vještine i sposobnosti koje treba prenositi na nove generacije. Sve ovo ne bi bilo moguće da učitelji ne vole poziv kojim se bave.

Ovogodišnji 5. oktobar se obilježava pod motom : „ **VREDNOVANJEM NASTAVNIKA POBOLJŠAVATE NJIHOV STATUS** „

Cilj Svjetskog dana učitelja je da mobilizira sve odgovorne da daju punu podršku učiteljima, nastavnicima, profesorima, odgojiteljima, pedagozima i ostalim zaposlenim u odgoju i obrazovanju, kako bi se osiguralo da isti i dalje ispunjavaju potrebe budućih generacija te podižu obrazovanje na razinu društvene važnosti. Prigoda je to i za isticanje važnosti rada svih u odgoju i obrazovanju i njihovog utjecaja na razvoj društva u cjelini, ali i samog obrazovanja čiji su oni nositelji.

Nažalost na današnji dan se moramo osvrnuti i na stvarno stanje u kojem žive i rade učitelji, nastavnici, profesori, odgojitelji, pedagozi i ostali zaposleni u odgoju i obrazovanju, kako u Bosni i Hercegovini tako i u Unsko-sanskom kantonu.

Još uvijek se rad odvija u neuslovnim prostorima, ponekad opasnim po život i zdravlje i učenika i nastavnika. Nedostaju nam odgovarajuća nastavna sredstva, ali ono što najviše boli to je da se naš rad cijeni manje od rada službenika.

Da jedino mi ne možemo napredovati ma koliko se trudili i ma kakve rezultate postizali. Da za isti posao ne dobijamo istu plaću. Da politika nije nikad bila više prisutna u obrazovanju nego što je sad.

Još uvijek se traže uštede na onome na čemu ne bi smjeli štedjeti, a to je svakako odgoj i obrazovanje. To su nam pokazale zemlje koje su na vrijeme shvatile da ulažući u odgoj i obrazovanje ulažu u vlastiti razvoj i budućnost.

Koliko su učitelji važni u životu svakog djeteta govori i to da se svi mi sjećamo osobe koja nas je podučila prvim slovima i brojkama i otvorila vrata svijeta prepunog ljepote i bogatstva – svijeta znanja. Većina nas je zbog tog sjećanja i odabrala poziv učitelja.

Poštovane kolegice i kolege, mi znamo da nas najviše boli nepravda, jer cijeli svoj radni vijek učimo mlade generacije pravednosti i iskrenosti, a prema nama se čini nepravda i diskriminacija. Zato pozivamo sve odgovorne koji mogu ispraviti trenutno stanje da to što prije i urade. Vrednujte nastavnikov rad i nećete samo poboljšati njihov status, već i status cijele države i osigurati svijetlu budućnost za generacije koje dolaze.

Uz želju da što prije dobijemo status koji nam pripada, mi vam drage kolegice i kolege, u ime članova Kantonalnih odbora sindikata predškolskog, osnovnog i srednjeg obrazovanja i u naše lično ime, želimo

sretan 5. oktobar - Svjetski dan učitelja.

S poštovanjem,

PREDSJEDNIK KO SSOÖiO USK-a

Hadžić Zehra

Hadžić Z.



PREDSJEDNIK KO SSVOONK-a USK-a

Fajić Samir

